



---

## **Directivas davart la finanziaziun speziala "sport" concernent contribuziuns per material da sport e per urdains da sport**

Sa basond sin l'art. 31 lit. a da l'ordinaziun davart la promoziun dal sport e dal moviment (ordinaziun da promoziun dal sport) dals 7 da fanadur 2015,

relaschadas dal departament d'educaziun, cultura e protecziun da l'ambient ils 19 d'avust 2015

---

### **Art. 1 Contribuziuns**

<sup>1</sup> Contribuziuns sco proprietad permanenta da l'organisaziun petenta pon vegnir pajadas per:

- a) acquistar material da sport;
- b) acquistar urdains da sport.

### **Art. 2 Exclusiun da contribuziuns**

<sup>1</sup> Exclús da survegnir contribuziuns èn:

- a) material ed urdains da sport per stabiliments da dretg public;
- b) objects d'equipament ch'èn en possess persunal;
- c) material ed urdains da salvament, cun excepziun dal material per ils curs da la societad svizra da salvament (SSS) e dal club alpin svizzer (CAS);
- d) material ed urdains da sport che vegnan utilisads per il diever commercial;
- e) custs da reparatura e da mantegniment per il material e per ils urdains da sport;
- f) televisiuns, computers, notebooks e programs da computer da tut gener;
- g) systems da mesiraziun per diagnostitgar la prestaziun e meds auxiliars medicinalis;
- h) persunas cun dretg da survegnir contribuziuns tenor l'artitgel 12 literas b e d da l'ordinaziun da promoziun dal sport.
- i) material ed urdains da sport che vegnan acquistads exclusivamain u en emprima lingia per realisar occurrenzas da sport.

### **Art. 3 Inoltraziun e tractament da las dumondas**

#### **a) adressat**

<sup>1</sup> Las dumondas ed ils documents per survegnir contribuziuns ston vegnir inoltrads al post ch'è inditgà sin il formular da dumonda correspondent.

### **Art. 4 b) agiuntas**

<sup>1</sup> A la dumonda ston vegnir agiuntads ils suandants documents:

- a) formular da dumonda;
- b) offertas;
- c) quints annuals e rapports da revisiun dals ultims 2 onns;
- d) cedel da pajament.

### **Art. 5 c) termin d'inoltraziun / scadenza**

<sup>1</sup> L'acquisiziun respectivamain l'empustaziun dastga vegnir fatga pir suenter che la contribuziun è vegnida garantida.

<sup>2</sup> Sch'ina acquisiziun cumpensatorica betg previsibla sto vegnir fatga immediatamain, po l'uffizi per la scola populara ed il sport permetter in'empustaziun cun la resalva da la garanzia da contribuziun.

### **Art. 6 d) decisiun davart contribuziuns**

<sup>1</sup> Davart la concessiun da contribuziuns fin 50 000 francs decida il departament d'educaziun, cultura e protecziun da l'ambient a maun dals custs imputabels.

<sup>2</sup> Davart la concessiun da contribuziuns da passa 50 000 francs decida la regenza a maun dals custs imputabels.

<sup>3</sup> La concessiun da contribuziuns vegn communitgada en scrit directamain a las petentas ed als petents.

### **Art. 7 e) calculaziun da las contribuziuns**

<sup>1</sup> Las contribuziuns per il material e per ils urdains da sport importan maximalmain 40 % dals custs imputabels.

### **Art. 8 f) documents da rendaquint**

<sup>1</sup> Suenter l'acquisiziun ston vegnir inoltrads ils suandants documents:

- a) copias dals quint;
- b) mussaments da pajament, sin ils quals vegn inditgà la possessura u il possessur dal conto.

### **Art. 9 g) examinaziun dals documents da rendaquint / fixaziun definitiva e pajament da la contribuziun**

<sup>1</sup> Il rendaquint vegn controllà da l'uffizi per la scola populara ed il sport.

<sup>2</sup> Suenter avoir fatg l'acquisiziun ed il rendaquint, vegn la contribuziun fixada definitivamain e pajada sin fundament dals custs imputabels.

### **Art. 10 h) scadenza dal pajament da las contribuziuns**

<sup>1</sup> La contribuziun garantida da la finanziaziun speziala "sport" scada 2 onns suenter ch'ella è vegnida concedida.

### **Art. 11 Cundiziun**

<sup>1</sup> Il pajament da contribuziuns a favur da material e d'urdains da sport è collià cun la cundiziun da represchentar las marcas «grischunSPORT» e «Swisslos» en moda adequata. Bandieras u models da stampa correspondents pon vegnir retratgs dal post ch'è inditgà sin il formular da dumonda.

**Art. 12 Recurs**

<sup>1</sup> Cunter las decisiuns dal departament respectivamain da la regenza poi vegnir fatg recurs tar la dretgira administrativa dal chantun Grischun, Obere Plessurstrasse 1, 7000 Cuir, e quai entaifer 30 dis dapi la comunicaziun da la decisiun contestada.